

Script of Morning Gojri News Bulletin 30 December 2024 at 1015Hrs

مارننگ گو جری نیوز بلیٹن مو رخہ 30 دسمبر 2024

یوہ آکا شوانی جموں ہے محبوب سلطانی تیں خبر سُنو۔

ISRO SPADEX

بھارتی خلائی تحقیقی تنظیم اِسرو آج رات سری ہری کوٹہ توں 2 سیٹلا ٹٹاں نانہہ خلاء مانہہ چھوڑے گی، تانجے مدار یعنی اربیت مانہہ خلائی طیا راں نانہہ جوڑن تے کئی کرن غو مظاہرو کیو جا سکے۔ اس قدم سنگ بھارت دُنیا غو چوتھو مُلک بن جائے گو جہڑو اس کامیابی نانہہ حاصل کرے گو۔ اس ضمن مانہہ اِسرو غو مضبوط راکٹ پولر سیٹلا ٹٹ لانچ وپیکل ”پی ایس ایل وی“ اِن دو سیٹلا ٹٹاں نانہہ 4 سو 76 کلو میٹر غا گول مدار مانہہ رکھے گو تے جنوری غا پہلا ہفتہ مانہہ خلاء اندر جوڑن غا تجربہ غی کوشش کرے گو۔ سپیس ڈاکٹینگ مشن بھارت غی خلائی کھوج بارے مستقبل غا منصوباں غو اک اہم قدم سمجھیو جا رہیو ہے جن مانہہ چن ور مٹی تے پتھر زمین ور آنا، چن غی سطح ور خلا باز نانہہ اُتارن تے انٹریکشن بھارتیہ اسٹیشن شامل ہیں۔ واضع رہے ہون توڑی صرف امریکی، روس تے چین نے مدار مانہہ خلائی طیاراں نانہہ جوڑن بارے ٹیکنالوجی مانہہ مہارت حاصل کی ہے۔

LG School

لیفٹنٹ گورنر منوج سنہا نے پچھلے تہارے کہیو ہے جے قوم غا مستقبل غو فیصلو سکول کیمپس مانہہ وے۔ اُنہاں نے مزید کہیو جے مہارہا تعلیمی نظام غو بنیادی مقصد ہر منفرد شخصیت نانہہ اک الگ موقع فراہم کرنو تانجے وے کچھ نوی تخلیق تے اپنا الگ ہنر غے ذریعے قوم غی بھلائی بہتری مانہہ اپنو حصو پیش کر سکیں۔ واضع رہے جے اُنہاں نے اُنہاں گلاں گواظہار جموں یونیورسٹی غا جنرل زوراور سنگھ آڈی ٹوریم مانہہ جموں سنسکرتی سکول گا سالانہ تہارے تقریب غے دوران کیو۔ اپنا خطاب غے دوران ایل جی موصوف نے اسکول غی انتظامیہ، اساتذہ تے طلباء نانہہ سالانہ تہارے تقریب ور مبارکباد دی۔ اُنہاں نے اِس گل ور زور پاتاں واں کہیو جے اسکول غی تعلیم غو بنیادی مقصد بچاں غا ذہنی صلاحیت نانہہ اُجاگر کرنو ہے۔

CM Meeting

وزیر اعلیٰ عمر عبداللہ نے برفباری توں بعد بحالی غی کوششاں غو جائزولین واسطے اک اعلیٰ سطحی اجلاس غی صدارت کی ہے۔ جس مانہہ جموں کشمیر غا برفباری توں متاثر علاقوں ور توجہ پائی گئی۔ اس ضمن مانہہ جموں غا متاثرہ ضلعان غا ڈپٹی کمشنر ان نے بجلی، پانی غی فراہمی تے سڑکاں ور گڈیاں غی آؤ جائی نانہہ بحال کرن بارے کا روائی غی جانکاری فراہم کی۔ اِس سلسلہ مانہہ وزیر اعلیٰ نے افسران نانہہ ہدایت جاری کرتاں واں کہیو جے رابطہ سڑکاں وروں برف ہٹان نانہہ ترجیح دیں تے قومی شاہراہ ور گڈیاں غی آؤ جائی نانہہ یقینی بناویں۔ اُنہاں نے عوامی شاکایتاں غا جلد حل تے متوقعہ برف بارے تیاریاں نانہہ بہتر بنان ور وی زور پایو۔ واضع رہے جے یاہ میٹنگ ویڈیو کا نفریننگ غے ذریعے منعقد کی گئی تھی، جس مانہہ چیف سیکریٹری اتل ڈلو، اڈیشنل چیف سیکریٹری دھیرج گپتا، صوبائی کمشنر جموں تے دوجا سول انتظامیہ غا سینئر افسر وی موجو دتھا۔

Dy CM Reasi Visit

نائب وزیر اعلیٰ سریندر کمار چودھری نے پچھلے تہارے کٹڑا غو دورو کیو تا نجے مقامی لوکاں غا مسائل غو جائزو لے غے اُنہاں نانہہ حل کیو جا سکے۔ اس دورہ غے دوران بکھ بکھ وفود نے نائب وزیر اعلیٰ سنگ ملاقات کر غے اُنہاں نانہہ اپنا مسائل با رے دسیو۔ اس دوران جناب سریندر کمار چودھری نے وفود سنگ گل بات کر تاں واں کہیو جے حکومت لوکاں سنگ مضبوطی نال کھلی وی ہے تے ان غی فلاح و بہبود اور ترقی واسطے پُر عزم ہے۔ اس ضمن مانہہ اُنہاں نے یقین دھانی کرواتاں واں کہیو جے عوام غا مسائل تے مطالبہ نانہہ ترجیح بنیا داں ور حل کیو جا ئے گو۔

MoS DISHA

مرکزی وزیر مملکت ڈاکٹر جتندر سنگھ نے رام بن مانہہ ”دیشا“ میٹنگ غی صدارت کی، تانجے چل رہیا پروجیکٹاں اور عوامی فلاحی اسکیمیں غو جائزو ليو جا سکے۔ اُنہاں نے لگاتار بارش تے ٹھنڈ آلا موسم غے دوران بجلی تے پانی غی فراہمی غا مسائل با رے وی گل بات کی۔ اس میٹنگ غے دوران وزیر موصوف نے بکھ بکھ سکیمیں جن مانہہ پی ایم سوریہ گھر مفت بجلی یوجنا، پر دھان منتری ویشوکرم یوجنا تے آیوش مان بھارت پردھان منتری جن آروگیا یوجنا شامل ہیں، با رے عوام نانہہ بیدار کرن تے خصوصی طور پر 70 بہراں توں متی عمر غا بزرگاں نانہہ بیدار کرن ور زور پایو۔ اُنہاں نے کہیو جے شہد نانہہ اک ضلعو اک پیداوار نانہہ سرکار ی تقریبات مانہہ یادگاری اشیاء غے طور پر استعمال کیو جا ئے اور آروما مشن غے ذریعے لوینڈر غی کاشتکاری نانہہ رام بن تک بدھایو جا ئے گو۔ اس دوران جناب سنگھ نے رام بن مانہہ منعقد عوام دربار مانہہ مقامی لوکاں غی شکایات وی سُنیں۔

Khwas Rankings

راجو ری ضلع غا بلاک کھواس نے مثالی بلاک غا رُمرہ اندر درجہ بندی مانہہ اک نمایاں کامیابی حاصل کی ہے۔ اس ضمن مانہہ نیتی آیوگ غی طرفوں جا ری مثالی بلاک غی حالیہ درجہ بندی مانہہ کھواس بلاک نے 4 سو 53 واں مقام توں بہتری لیا غے 5 ووں مقام حاصل کیو ہے۔ اس درجہ بندی مانہہ پورا مُلک غا 5 سو بلاک شامل تھا۔ یاہ اہم پیش رفت ڈپٹی کمشنر ابھیشیک شرما غی قیادت مانہہ ہوئی ہے۔ جہیڑی موثر حکمرانی تے مقامی ترقی غا مثبت اثرات نانہہ اُجاگر کرے۔

Weather Highway

محکمہ موسمیات نے جموں کشمیر مانہہ 30 تے 31 دسمبر نانہہ کچھ اک مقامات ور شدید ٹھنڈ غی لہر با رے جانکا ری دتی ہے۔ اس ضمن مانہہ سیلانیاں تے مسافراں نانہہ صلاح دتی گئی ہے جے اس دوران حفاظت نانہہ یقینی بنان واسطے ایڈوائزری ور عمل کریں۔ محکمہ موسمیات نے مزید دسیو جے 3 توں 6 جنوری بشکار اُچیرا علاقان مانہہ درمیانہ توں پہاری برفباری ہو سکے۔ اُنکاں جموں سرینگر قومی شاہراہ نانہہ گڈیاں غی آؤ جا ئی واسطے کھلو رکھیو گیو ہے جد کہ مغل سڑک برفباری توں بعد بند کر دتی گئی ہے۔

اس غے نال ہی خبراں غو یوہ بلیٹن ختم ہوؤ۔